



## *Komunikadu Imprensa*

**31 Janeiro 2013**

### **Kazu violénsia doméstika kontinua julga iha Tribunál Distritál Dili**

Iha 30 Janeiro 2013 Tribunál Distritál Dili hala'o julgamentu ba krime ofensas integridade fízika simples ho natureza violénsia doméstika.

Ministériu Públiku akuza katak iha 1 Novembru 2011 iha Becora Bekusi – Sentru, iha tuku 10:00 kalan, arguidu ho inisial GdA prátika krime hasoru lezada JV ne`ebé hanesan nia kónjuje.

Ministériu Públiku dehan katak arguidu tuda rahun telephone, hodi basa dala rua iha lezada nia hasan sorin loos, dudu monu ba rai no sama dala ida iha ulun parte loos. Asaun ne`e halo lezada sente moras maibe laiha bubu no la-konsege ba halo tratamentu iha ospital.

“JSMP apresia tribunál nia esforsu hodi julga kazu violénsia doméstika tanba ne`e refléta obrigasaun Timor-Leste atu asegura justisa ba vítima sira no proteze fetu sira husi violénsia iha futuro. JSMP nafatin enkoraja autór judisiáriu sira aplika pena adekuaudu atu refléta conseitu violénsia doméstika hanesan krimi públiku,” dehan Diretór JSMP Luis de Oliveira Sampaio.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika. Iha alegesaun final, Ministériu Públiku husu ba tribunál atu aplika pena multa tuir artigu 75 Kódigu Penál ka pena alternativa.

Durante julgamentu arguidu konfesa faktus tuir akuzasaun Ministériu Públiku. Tanba ne`e, iha partes seluk, defeza hato'o katak tanba arguidu konfesa ona no arguidu nia situasaun ekonomia fraku, husu ba tribunál atu aplika multa deit. Defeza mós dehan katak atu prevene kazu violénsia doméstika presiza ema tékniku hodi halo akompañamentu ba sira.

Kazu ne`e rejista iha tribunál ho Númeru Prosesu: 591/2012/TDDIL. Dra. Jasinta Correia Barros preside julgamentu ne`e. Dr. Vicente Brites representa Ministériu Públiku no arguidu hetan defeza husi Dr. Manuel Lito Exposto husi Eskritóriu Defensória Públiku.

Tribunál marka julgamentu ba leitura sentensa iha 12 Feveiru 2013 tuku 17:00 loraik.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883

[www:jsmp.tl](http://www.jsmp.tl)